



La corsa cun charrotschas a quatter chavals ha procurà per tensiun.

FOTOS E. BARDILL



Questa charrotscha da posta circulara pli baud sur il Pass dal Flüela.



L'Uniu da tamburs da Domat s'ha era fatg udir.

# Grischun e Glaruna al Marché-Concours a Saignelégier

DAD ELISABETH BARDILL

■ **Ils chavals èn il punct central da la gronda festa en las Francas Muntognas. Preschentaziuns, cursas, success d'allevamaint e commerzi attiran amatur da chavals da tut il pajais en il Giura.** Chaussas da star stut han ins pudì admirar la fin d'emna passada en l'arena verda a Saignelégier. Il cortegi dumengia è stà il punct culminant. La multifriedad da pussaivladads per lavurar cun ils chavals ha sveglià sentiments e nostalgia per cuntradas vastas, sulegl, vent ed aventuras. La delegaziun dals giasts a l'occurrèza a Saignelégier, ils chantuns muntagnards Grischun e Glaruna, èn arrivads sin piazza da festa en ina charrotscha da posta che circulava pli baud sur il Pass dal Flüela. Ins ha era pudì vesair ina «schlitteda engiadinaisa» e ski-jöring cun chavals da la regiun. Al medem mument eran en acziun era trais dunnas dal Partenz che han sunà la tiba. Ina famiglia da purs ha manà sur la piazza da festa sia chavalla che tirava in pign su-

enter sai. Sper ella trottava il pulieder. Era ils chavals da sauma cun ils berniers s'èn preschentads. Il chaval per la lavur agricola, per il transport da persunas e martganzia sco era per il sport d'equitaziun è anc adina fitg pretschà. Quai han cumprovà las bleras aspectaturas ed aspectatur.

## La «quadrille» ha fascinà

In ulteriur punct culminant è stada la quadriglia che gliued giuvna ha preschentà cun lur chavals. Il maletg armonnic da questa «quadrille» champestra ha mussà tge ch'ìls freiberger èn abels da far. Ils otg chavals cun lur chavaltgadras en rassis cotschnas e blauas ed ils quatter chars han impressiunà cun lur gronda disciplina. Cun chaminar tras l'areal da festa è diventada conscienta la dependenza vicendaivla da las allevaturas ed allevatur da chavals envers lur animals. Ils chavals spetgavan bain nudrids e cultivads plain tensiun al mument ch'èls vegnivan en acziun. La preschantaziun dals stalluns è stada per las allevaturas ed

allevatur in'attracziun speciala. Daper-tut sin l'areal eran experts che respundavan las dumondas dals visitadurs interessads. L'allevament da chavals en il Giura ha gronda tradiziun. Cun demonstrar co che uman e chavals collavuran en questa cuntrada criva ha mussà «Le marché-concours national de chevaux» a Saignelégier las fermezzas dal chantun Giura.

## Program da gala cun participaziun dals giasts

Commembras e commembers da las regenzas da Glaruna e dal Grischun eran era la saira da gala ils giasts d'onur. Il program cultural s'è preschentà cun produziuns dal «Chor dils Larischs», dal «Damenchor Chur Süd», da la «Harmoni-musik Glarus», da la «Uniu dals tamburists da Domat» e dal «Jodelclub Glärnisch». En tut la vischnanca era gronda festa populara cun stands da martgà, stands cun buntads culinaricas, carussel e tut quai che fa part ad ina talà festa.



Dunnas dal Partenz han sunà la tiba.



Atmosfera a Saignelégier.



Annelies Bärtsch da Furna cun ina chavalla e ses pulieder.



Famiglia Buchli da la Stussavgia vid la lavur cun ses chavals.